



D. O. M.
POSITIONES ANATOMICÆ
ET
CHIRURGICÆ.



EX ANATOMIA.



ORBORUM assultibus undique patere corpus humanum certius; immunitate labia existimaveris? Labia vultus honos & decus, ad vocem & masticationem composita, utrique famulantur: at ipso de amœnitatum fonte exurgit semper amari aliquid; ægrescunt teneræ fauces, ægrescunt labia; hæc ab ortu disjuncta, multiplicem in modum faciem deturpant; vel etiam juxta benignæ naturæ leges progenita, ab externis causis lāduntur, Chirurgiæ beneficio in utroque cāssananda: sic amissos aut ab ipsâ quidem naturâ denegatos lepores,

restituit Chirurgus ; sic gratiorem vitæ usuram excolit, præsentibus auxiliando, futuris-ve sagaciter præcavendo incommodis.

TEGUMENTA communia musculos ubique vestire vulgare est ; opinionum circa labiorum musculorum actionem & numerum diversitas, tum à naturæ varietate, tum ab errore indagantium deducenda ; alii ad alter-utrum labium, alii ad utriusque commissuram terminantur ; hinc in proprios & communes dividi solent : non idem in singulis perspicitur fibrarum ordo, tractus, directio ; non idem usus, conformatio, situs ; hinc varias receperunt denominationes.

SUORUM musculorum ope, quandoque & pyramidalium Nasi actione diversimodè moveri labia nemo inficias ibit.

LABIORUM textura, musculosa, spongiosa, modò intumescens, modò flaccescens margine glanduloso decoratur tenuissimâ obducto cuticulâ quæ membranæ oris cavitatem intus investientis videtur propago ; ex hujus-çe membranæ duplicaturâ sobolescit habenula quædam gengivæ & labiis annexa ; hanc Frenulum dixerunt.

LABIIS subjacent gengivæ, harum textus est constrictus, subruher, elasticus, membranâ tenui & validâ obductus, ossium maxillarium periosteo adhærentes, utramque faciem marginis alveolaris tam supernè quàm infernè obtegunt ; singulos inter dentes interponuntur, totque in eorum substantiâ conspiciuntur spatiola quot dentes numerantur.

LABIORUM vasa ex carotidibus, jugularibus externis, nervi ex ramo medio quinti paris, nonnulli ex portione durâ septimi emittuntur ; hæc ubi faciei latera pererravere, Ossium utriusque maxillæ substantiam subeunt, cæterasque partes (quæ in labiis leporinis afficiuntur de quibus quærenti ratio fiet) mirum in modum irrigant & nutriunt.

EX CHIRURGIA.

SI naturæ nunc interpretes, nunc adjutor Chirurgus, hujus providæ matris, in vulnere curatione, votis prudenter annuere debeat maximè, in illis quæ faciei insiguntur vulneribus, obsta-

cula scilicet removendo, ut quæ pars corporis ornamento dicata fuerit, molestâ deformatate non deturpetur.

SOLUTAM transversim ellipticam labiorum continuitatem, labium leporinum appellaverunt artis Protomagistri; huic denominationi favet similitudo cum labio leporis animalis.

IN unico, duobus-ve in locis quandoque dissectum ab ortu, deprehenditur labium superius, inferius verò rarissimè; has-ce divisiones limitantur plerùmque Alæ nasi, ipsiusve infrâ radicem sese exponit pars intermedia, nunc Ossium maxillarium major minörve detegitur disjunctio; modò veli palatini ampla plüs minüs-ve divisio, labiorum divisioni continua; (a) nunc fissam, nunc renutam omninò uvulam conspicies; (b) his, monticuli ad instar hiatüs inter margines, prominet dens unicus aut duplex, interdum etiam & caruncula; illis divergens indecorum in modum apparet scissura, naris Ozænâ, (c) aut tumore Cancroso nonnunquam stipata; in quibusdam, deficientem, in aliis alterutram in Narem plus minüsve prolapsam Vomere, ipsi nos nuperrimè observavimus: hinc innumeræ labiorum leporinorum species: hinc in curatione diversæ indicationes.

LABIORUM leporinorum ab ortu obscura latet αἰτιολογία. An structricem Animæ potestatem agnoscet? Desiciunt viæ, materies, motus, vana sunt experimenta: an malæ & ex origine factüs in utero materno conformationi competit? Comprobant promulgata celeberrimi Domini Winslow in act. Regiæ Scient. Acad. ratiocinia, his adversantur experimenta hujusce sententiæ fautoribus minimè consona: discutiant otiosi litem; non in inquirendâ cognitu tam indocili causâ, nobis immorandum; amissâ, aut denegatâ ab ingrato fato vitæ commoda, prout arte licet, restituere satius.

SI ab externis fissus fuerit musculus orbicularis, usüs imperio, eadem ac prædicta divisio salutatur denominatione: quemad-

(a) De hisce Variis labiorum leporinorum speciebus legantur Act. Regiæ Chirurg. Acad. part. III^a, pag. 181^a, & sequent.

(a) Vid. Heist. Observat. Chirurg. Cap. LXXV. pag. 668^a.

(c) Vid. Junker. Observ. Cap. LXXIII^o, pag. 165^a, sed hicce casus rarissimus est.

4

modum autem à vulnere non discrepet, easdem ac vulnus sub:
divisiones curamque patietur.

DIAGNOSIS ex præfatis elucet.

A vulneris essentiâ, sitû, figurâ, substantiæ deperditione;
à complicantium naturâ & sævitie, ab ægri temperamento,
ætate demùm, prosperus plus minùs-ve laborum leporinorum
curationis prælagiendus est exitus.

Haud rarò perfectam, sæpiùs partiariam curationem admit-
tunt laborum leporinorum species; si dentis unius aut duplicis
corpus promineat, solerter extrahatur; si caruncula, scapello
auferatur; si maxima vulneris adest referatio, aut substantiæ
insignis deperditio, majorem ob deformitatem ab operatione
abstinere præstat; si tumore Cancroso stipetur divisio, causticis
tollatur tumor, qui si expansus aut exulceratus adfit non tan-
gendus (a).

Si naris Ozæna divisionem concomitur; non fiat futura, quin
priùs consolidatum remaneat ulcus fœdum; si duplex at non major
extremitatum hiatus appareat, operatio Junkero adveniente (b)
instituta, sæpius succcessit. Ad rimas ossium maxillarium Palati-ve
cõjungendas, ad uvulæ scissuram aut regenerationem, inania pro-
sùs evadunt artis auxilia; coadunatis partibus externis, opus naturæ
cõfidenter committendum: in harum-ce partium approximatione
illius indulgentem efficaciam nonnulli faustis avibus experti
sunt (c).

Ad partium conjunctionem Chirurgo armamentarium multi-
plex; modò ex suturis, modò ex sitû & fasciationibus sua mutua-

(a) Licet egregium Chirurgiæ documentum sit tumorem Cancrosum
exulceratum & expansum, non tangere: vir artis suæ limites producere
valens Dominus Morand, regiar. Lond. & Paris. Acad. Socius, Reg.
Chirur. Acad. Secretarius, hujusce naturæ tumorem musculum quadra-
tum efficientem solerter abstulit ægrumque perfectè sanavit.

(b) Vid. Junkerum loco citato, pag. 563⁴.

(c) Vid. Observat. Domini Gerard Chirurg. in A& Reg. Chir.
Acad.

5

tur praefidia; labio leporino recenti, simplici, aut composito & à causâ externâ producto, futura, nunc nodosa, nunc licca, vel utraque simul quandoque competit: hæc etiam una cum situ & congruâ fasciatione conlocari amant.

IN curatione labiorum leporinorum à causâ internâ; intortam ut prævalentem futuram admittimus; præmissis venæ sectionibus aut Catharisi, si res postulet, operatio celebranda: hanc in tenerioribus infantulis, iustè timidis Roonhuyssii (a), aut Heisteri (b) experimentis nimium fidens, non instituet Chirurgus; non donec alterum aut tertium, ut dicunt, mensem, sed donec tertium aut quartum ætatis annum attigerint, expectandum.

PRÆPARATO apparatus, in luce collocatur ager; gengivam solenter à labio, si huic adhæreat, disjungit operator, & ne rursus coalescant, lintheum interponit; extremitatum callositates unicâ incisione, rejectis auctorum Volfellis, in angulum acutum rescocat. Labia, genis à Ministro versus divisionem firmiter adductis, Acû duplici triplici-ve pro re natâ transfodit; filis demum inter Acus salubres in duplicem spiralem contortis, futuram sustinet ac perficit.

DENTIBUS, si deficiant, substituitur lamina plumbea; si in adulto celebranda sit futura, Acutenaculum à Domino Petit Chirurgus excogitatum usurpetur; si in junioribus, inutile: an futura rejicienda prorsus in adultis? an soli patellarum actioni labiorum conglutinatio committenda sit (c)? judicabit prudens mederique sciens Chirurgus; spleniorum sub utrâque Acuum exitu impositio, illarum sectionem noxiam & inutilem imprimè demonstrat.

OPERATIONE celebratâ vulnus deligandum: plumaceolus

(a) Vid. Roonhuyssii Observat.

(b) Vid. Heist. Observ. Chirurg. pag. 671^a. Part. 1^a.

(c) Hanc sententiam affirmat Fabric. ab Aqua p. Capite 220. pag. 108^a. Hanc methodum valere posse in adultis prudentioribus, non disputandum, præsertim si succurrant electæ fasciationum species in Actis Reg. Chirurg. Acad. delineatæ, sed donec illam noxiam esse demonstraverint, futuram intortam ut prævalentem admittimus, patellatque Fabricii ut medium incertum asserimus.

balsamo Peruviano imbutus, aut altero ejusdem efficaciæ super imponendus, qui idoneâ fasciatione firmabitur.

FASCIATIONES inter eligere est quas excogitaverunt Domini de la Peyronie, Quesnai, de la Faye, quarum usus in insigni labiorum refectione optimè successit. Cæterùm singulis diebus locus affectus inungatur: si inflammatio vehementior, febris, convulsio aliaque id genus mala succedant; solvantur suturæ (a): à sermone & lamento abstineant agri, & congrua unicuique symptomati subministretur *Therapia*.

(a) Laudandus Dominus Foubert solutis Sutaris, Acubus suppeditat ciliindriculos plumbeos quorum ope vulneris extremitates apprimè conglutinantur. Tamen haud semel observatum est & potissimum à M. Morand in Regio Invalidorum Nosocomio, quòd licet solutæ fuerint suturæ, legitimâ tamen vulnus obductum fuerit cicatrice sic instructâ ut intervallum repletum observaverit lineis semi-circularibus & ellipticis, musculi fibrarum ad instar.

Has positiones, DEO JUVANTE & Præsido JACOBO MOTHEREAU, Chirurgiæ & in almâ Universitate Parisensi Art. Liberal. Magistro, tueri conabitur JACOBUS BÉRARD, Santonensis, Artium Liberalium Magister.

P A R I S I I S,

IN REGIIS CHIRURGORUM SCHOLIS.

*Die 3^a. Octobris, à sesqui - secundâ post meridiem
ad Septimam. Anno Domini 1752.*

P R O A C T U P U B L I C O,

E T

M A G I S T E R I I L A U R E A.

Typis DELAGUETTE Regii Chirurg. Collegii
Typographi. 1752.